

**Dewan Rakyat kecoh, Bung Mokhtar salahkan DAP berhubung blogger seks Malaysian Insider
July 16 , 2013
OLEH MD IZWAN**

Kekecohan timbul di Dewan Rakyat apabila Datuk Bung Mokhtar Radin menuduh DAP adalah pihak yang bertanggungjawab di belakang blogger seks Alvin Tan dan Vivian Lee di atas kejadian muat naik di Facebook yang menghina Islam.

Ahli Parlimen Kinabatangan dari Barisan Nasional (BN) itu, menggesa pasangan itu ditahan serta merta dan menyalahkan DAP di atas insiden itu.

"Mereka seharusnya didakwa serta merta dan jangan benarkan mereka bergerak bebas.

"Saya sedar trend ini berlaku selepas Pilihan Raya Umum ke 13, mungkin ini ditaja oleh DAP," dakwanya.

Sejurus selepas itu, beberapa pemimpin DAP bangkit membantah kenyataan Bung kerana bersangka buruk serta menggesa beliau menarik balik kenyataannya.

Bagaimanapun, Bung enggan menarik balik serta mempertahankan hujahnya dengan menegaskan beliau berkata "mungkin" dan bukan menuduh.

"Saya kata hanya mungkin," kata Bung apabila didesak oleh pemimpin DAP dalam Dewan Rakyat.

Semalam "pasangan lucah" Alvin Tan dan Vivian Lee yang dipanggil oleh Suruhanjaya Komunikasi dan Multimedia Malaysia (SKMM) hadir memberikan kenyataan di ibu pejabat agensi itu di Bangunan Sultan Abdul Samad.

Mereka memberi kenyataan untuk membantu siasatan berhubung memuat naik gambar hidangan dan kapsyen yang menyentuh sensitiviti umat Islam di laman sosial Facebook.

Tahun lalu, Alvin dan Vivian menggemparkan negara apabila menyiarkan gambar dan video aksi seksual mereka dalam blog mereka.

Ketua Komunikasi Strategik SKMM, Sheikh Raffie Abd Rahman, berkata pihaknya dalam proses melengkapkan siasatan bagi merujuk kes berkenaan ke Pejabat Peguam Negara dan berharap siasatan dapat dilengkapkan dalam masa dua hari.

Sheikh Raffie berkata, pihaknya perlu menjalankan siasatan menyeluruh bagi memastikan bukti kes berkenaan mencukupi untuk pendakwaan.

"Jika sabit kesalahan, pasangan berkenaan boleh didakwa di bawah seksyen 211 dan 233 yang memperuntukkan hukuman setahun penjara dan denda RM50,000.

"Kami menyeru orang ramai menghormati bulan Ramadan dengan elak mencetus kontroversi melalui kiriman di laman sosial yang bakal mencetuskan sensitiviti kaum," katanya lagi. - 16 Julai, 2013.

<http://www.themalaysianinsider.com/bahasa/article/dewan-rakyat-kecoh-bung-mokhtar-salkan-dap-berhubung-blogger-seks>